

Von der gedächtnuß

fallen/den Kopff für deß Keyfers Fuß gelegt/gleich als ob es in anbettet (Wie sie es dem Keyser zugefallen also/vmb Fuchßschwänz zuuerkauffen/haben zu verstehen geben)welches dazumal bey ihnen für ein groß Wunderwerck gehalten worden/also/das es auch in desselbigen gewaltigē Keyfers historias kommen / wiewol es bey vnsern zeiten nichts selzams / dann ich dergleichen Ross viel gesehen/auch selbst gehabt/die solche vnd noch viel andere geradigkeiten mehr getrieben haben: Wie dann auch Plinius schreibt/das man Ross gefunden/so in den Schlachten die Spieß vnd Wehren mit dem Maul von der Erden auffgehoben/vnd iren Herrn dargereicht. Die Tartarn (welches dan ein Völklin/so fast auff dem Raub ligt/ vñ sein meistes einkommen darvon hat) wann sie auff ire Nachbarn straißen/so gar gegen Mitternacht ligen/vnd bey denen viel Monat an einander Nacht ist (wie man darvon schreibt) Vnd ob es schon taget/so ist doch derselbige so dunkel/ das ein schlechter vndercheid zwischen Tag vnd Nacht/Vnd wann sie also dieselben berauben wollen/so setzet sich der mehrertheil derselben Tartern auff Stuten / die Säugfüllen haben/ (verwaren doch dieselben zuvor an dem ort/allda sie auffgefessen) straißen dieser gestalt einen grossen weg in das Land hinein/Rauben was sie mögen/ vnd weil solches in der finstern geschicht / wüsten sie selbs den Weg nicht wider zurück zukommen: Derhalben wann sie ire sachen verricht/vnd vermainen zeit zu sein/wider nach Haus zuziehen/so hengē sie den Stuten allein den Zaum/vnd lassens lauffen/wo hin sie selbs wollen/die haben nun in der gedächtnuß/welchen Weg sie kommen seind/den lauffen sie gar schnell wider zurück zu iren Füllen/vnd bringen dieser gestalt ire Herrn wider anheims/die villeicht sonst Dahinden blieben/vnd den Weg nach Haus selbst nicht wider treffen kondten. Ebenmessiger gestalt hat auch ein Stut / so ein Säugfüllen gehabt/ den König Darium auß dem Staub getragen / als er eine Schlacht verloren / sonst were er gefangen worden/wie Alianus schreibt. So melden auch alle die jenigen/so von der Keutterey je geschrieben haben / das man im abrichten/den Rossen solle zusprechen/damit sie deß Menschen Stimme vnd Sprach gewöhnen/vnd wissen/was sie thun sollen/wann man ihnen zuspricht/damit man nit allezeit Sporen vnd Stecken brauchen dörffe: Dann kein zweiffel zu haben/sie die Sprachen lehren verstehen (so viel ihr thun vnd wesen belanget) wie man so gar an den Flammenspachischen Fuhrleuten sehen mag/die wissen ihren Rossen zuzusprechen / wann sie fort sollen gehen oder still stehen/ Item/wann sie sich auff die rechte oder lincke Hand sollen wenden/Vnd vermeine also in diesem Capitel genugsam dargethan zuhaben/was ich in der Rubrica anfänglichlich verheissen habe.

Von